

Kem Pemimpin Muda Prihatin Air



Lanchang, 20 Mei- Fakulti Kejuruteraan Awam & Sumber Alam (FKASA) dengan kerjasama UNESCO-IHP Malaysia menganjurkan Kem Pemimpin Muda Prihatin Air, Bengkel Komuniti, Air & Kehidupan dan Reaching the Grassroot Peringkat Kebangsaan Tahun 2017 bagi Zon Timur di Insitut Biodiversiti, Lanchang Pahang.

Seramai 41 orang pelajar menyertai kem ini membabitkan enam buah sekolah sekitar Kuantan manakala bengkel komuniti turut melibatkan komuniti Orang Asli, orang awam dan belia. Selain itu, program Reaching the Grassroot juga berjaya menarik penglibatan 160 orang pelajar sekolah dan 40 orang remaja Orang Asli.

Program diadakan bertujuan meningkatkan kesedaran komuniti tentang peri pentingnya pengurusan air yang baik bagi menjamin kelestarian sumber air pada masa sekarang dan akan datang dengan tema "Memasyarakatkan Teknologi Kelestarian Air dan Kehidupan".

Hadir dalam program adalah Dekan FKASA, Dr. Mohamad Idris Ali yang turut dihadiri Setiausaha Agung Suruhanjaya Kebangsaan UNESCO Malaysia, Mohd Khairul Adib Abdul Rahman dan Pengerusi Jawatankuasa Pendidikan, Latihan dan Penerangan Awam UNESCO-IHP Malaysia, Profesor Madya Dr. Nabsiah Abd Wahid.



Menurut Dr. Mohamad Idris, program ini memberi pendedahan tentang pengurusan sumber air di Malaysia dan peranan yang boleh dijalankan membabitkan pihak komuniti dan juga masyarakat setempat. Dalam program ini, agensi yang terlibat memainkan peranan sebagai fasilitator bagi mendidik dan menerangkan kepada para peserta kaedah memulihara, mengenal pasti kualiti sumber air, rawatan air, penggunaan kaedah sumber air alternatif, biodiversiti alam sekitar dan lain-lain lagi.

"Sebanyak 13 modul digunakan meliputi bidang berkaitan pengurusan sumber air secara bersepadu yang terpilih antaranya mempelajari proses kitaran air, peranan air, manusia dan kehidupan, mempelajari kaedah penentuan kualiti air minuman dan mendalami isu keselamatan air," katanya.

Turut diberi penekanan bagi penuaian air hujan sebagai sumber air, alternatif dan modul yang menekankan kaedah-kaedah mudah penjimatan air domestik seperti kaedah guna semula air dan juga modul yang menekankan kepentingan pengekal biodiversiti hutan.

Selain itu, penganjuran ini juga memperlihatkan semua kumpulan sasaran ini menggalas tanggungjawab sebagai agen perubahan komuniti (community's changing agent) sesuai dengan kapasiti status dan peranan masing-masing dalam masyarakat.



Sementara itu, Pengarah Bahagian Sumber Air & Hidrologi, Jabatan Pengairan & Saliran (JPS) Malaysia, Dato' Ir. Hj. Nor Hisham Mohd Ghazali yang hadir dalam majlis penutup program mengharapkan kerjasama ini dapat diperkasa dalam meningkatkan peranan masyarakat dalam pengurusan lestari sumber air di negara ini.

Bagi pelajar SMK Alor Akar, Nurul Fatehah Abdul Halim dari Kuantan yang juga Pelajar Terbaik bagi Kem Pemimpin Muda Prihatin Air berpendapat program ini amat bermanfaat kepada beliau dan rakan-rakan yang lain dalam mendapatkan ilmu baharu mengenai sumber air dan alam sekitar dipelajari.

Disediakan Wan Muslimin Wan Nawang dari FKASA dan suntingan Bahagian Komunikasi Korporat

Posted By : NORHIDAYAH BINTI MOHAMAD Date Posted : 24-05-2017, 10:42:37